

Brintilornermut brintillu atorreqarnissaanut illoqarfinni imermit nukissiornermik pilersorneqartuni nukiup atorreqanngitsup atornissaanut Ilulissani misiliutaasumik suliniuteqarnissamut pilersaarummik Naalakkersuisut UPA 2018-imut saqqummiussinissamik peqquneqarnissaat pillugu Inatsisartut aalajangiiffigisassaattut siunnersuut.

(Inatsisartuni ilaasortat, Debora Kleist, Anders Olsen, Vivian Motzfeldt, Bendt B. Kristiansen aamma Mala Høy Kúko)

Akissuteqaat

(Inuussutissarsiornermut, Suliffeqarnermut, Niuernermit Nukissiuuteqarnermullu Naalakkersuisoq)

Aappassaaneerreqarnera

Aallarniutigalugu ataatsimiititaliap suliami uani peqqissaartumik sulisimanagera Naalakkersuisut qujassutigissavaat.

Sanaartornermut ataatsimiititaliap isumaliutissiissummini eqqaavaa brintimik nioqqutissiornissami siunertaasoq erngup nukinganik nioqqutissiornermi sinneruttup maangaannartinneqannginnissaa. Erngup nukinga oqaluuserineqaraangat tamakkiisumit annikinnerusumik iluaquteqarnek nukiup pineqartup annaaneqarneranik kinguneqaannartanngilaq. Nukissiassarmi taanna nungusanngilaq, kingusinnerusukkullu taseq imeqartillugu atorreqarsinnaalluni..

Illuatungaanili brintimik nioqqutissiorneq nukimmik annertuumik annaasaqarnermik kinguneqartarpoq, tassami brintimik nioqqutissiornermi nukiup atorreqartup 20% -ia angullugu taamaallaat iluaqutigineqartarmat. Nukimmilli annertuumik annaasaqartarnek taanna pisut ilaanni illersorneqarsinnaasarpoq, nukik iluaqutigineqartussaak akikitsuuppat, nukik taanna sinneruttuuppat aammalu toqqorneqarsinnaanani, assersuutigalugu anorip nukinga pineqartillugu.

Naalakkersuisut aamma teknologi taamaattoq annertuumik periarfissiissasoq, piffissarlu ungasinnerusooq isigalugu annertuumik pingaaruteqalerluni. Naalakkersuisullu Sanaartornermut Ataatsimiititaliamut allakkani ilisimatitsissutigaa Naalakkersuisut Nukissiorfiit qinnuiginiaraat niuernermi assersuummik suliaqaqqullugit.

Naalakkersuisut maluginiarpaat ataatsimiititaliap oqaatigigaa niuernermi assersuummik suliaqarnikkut aalajangiiffigisassatut siunnersuutip siunertaa naammassineqarsinnaasoq.

Taamatut oqaaseqarluta Naalakkersuisut isumaliutissiissut tusaatissatut tiguaat.